

## Մինչև տարեվերջ Հայաստանում կստեղծվի արագացուցչային ծրագրի գիտական խորհուրդ



Մինչև տարեվերջ Հայաստանում կստեղծվի արագացուցչային ծրագրի գիտական խորհուրդ, որում կընդգրկվեն Գերմանիայի, Շվեյցարիայի, ԱՄՆ-ի, Ճապոնիայի և Իտալիայի արագացուցչային կենտրոնների ղեկավարները: Այս մասին NEWS.am-Ինովացիայի թղթակցի հետ զրույցում ասաց ՀՀ ԿԳՆ գիտության պետական կոմիտեի նախագահ Սամվել Հարությունյանը:

Նրա խոսքով՝ խորհուրդը ընդհանուր առմամբ կունենա արտասահմանցի 5 անդամ և 3-4 փորձառու մասնագետներ Հայաստանից: Ս. Հարությունյանի խոսքով՝ արդեն իսկ պայմանավորվածություններ են ձեռք բերվել Գերմանիայի և Շվեյցարիայի արագացուցչային կենտրոնների ղեկավարների հետ, ովքեր համաձայնել են ընդգրկվել արագացուցչային ծրագրի գիտական խորհրդում: «Արտասահմանում գործող նմանատիպ կենտրոնների ղեկավարները իրենց փորձով և խորհուրդներով կաջակցեն հայ մասնագետներին, իսկ տարբեր արագացուցչային խնդիրներ կլուծեն հենց Հայաստանում», - ասաց Ս. Հարությունյանը:

Ըստ նրա՝ Հայաստանում այս ոլորտում կան հրաշալի մասնագետներ, որոնք լավ փորձառություն ունեն և աշխատանքային գործունեություն են ծավալել արտերկրում: Նրա տեղեկացմամբ՝ մինչև տարեվերջ եւս մի քանի երիտասարդներ կմեկնեն եվրոպական երկրներ վերապատրաստման, որպեսզի մինչև 2016թ., երբ ավարտվում է Candle ծրագիրը, մասնագետների պակաս չզգացվի:

Նշենք, որ «ԲԵՆԴԼ»-ը (CANDLE-Center for the Advancement of Natural Discoveries using Light Emission) թարգմանաբար՝ սինթրոտրոնային ճառագայթման օգտագործմամբ գիտական հետազոտությունների կենտրոն է նշանակում, որտեղ գիտնականներն ինտենսիվ լուսային հոսքի օգնությամբ հնարավորություն կունենան հետազոտել մոլեկուլներ, կենսաբանական օբյեկտներ և նյութեր: Փորձագետների գնահատմամբ՝ արագացուցչի արժեքը գնահատվում է մոտ 100 մլն դոլար:

Պետությունը պատրաստ է ֆինանսավորել նախագծի արժեքի 25 տոկոսը: Նշենք, որ վերջին մեկ տարում Candle նախագծի շրջանակներում Հայաստանը մոտ 3 մլն եվրոյի տարբեր գերժամանակակից սարքավորումներ է ստացել: